

元明事類鈔

欽定四庫全書

元明事類鈔卷十八

監察御史姚之駟撰

藝術門

醫學

納牛腹 元史布札爾力戰身中數矢血流悶仆太祖
命取一牛剖其腹納布札爾於內浸熱血中移時遂
甦

銅人鍼 元史類編竇默少避亂蔡州遇名醫李浩授

以銅人鍼法

十三科 元史諸人於十三科內不能精通一科者不得行醫

賜鋌如年 元史許國禎以醫徵莊聖太后疾治之即愈太后時年五十三遂以白金鋌如年數賜之

東垣十書 元史李杲深於醫所著有東垣十書

丹溪心法 元史類編朱震亨師事許謙一日母病延

醫因自悟曰人子不知醫或委之庸人寧無有失於是研究醫理治症多奇效學者稱丹溪先生

尚醫 元史中統元年置宣差提點太醫院事二十年改為尚醫監明馮璧詩尚醫冗食渠百輩公論共推君十全

知非人脉 庚己編元至正間范益為醫官有老嫗攜二女求醫益診之曰何以俱非人脉嫗曰妾西山老狐也知公仁術故來投耳益曰禁城百神呵護何得

至此嫗曰真天子自在濠州此間空虛故得出入益異其言授以藥

劉李 王禕叢錄金時張潔古劉守真張子和李明之皆精於醫潔古子和一再傳無聞焉明之專於補守真主於攻李氏弟子多在中州劉氏傳於江南而南方皆宗之

不言疹靨 王世貞集痘疹于幼為甚危而醫之於方絕不及或曰其症不起唐以前第不知所由始考之

前史備載人貌之妍醜正偏獨不言疹靨其然哉

紅丸 三朝典要光宗大漸召諸臣入宮有鴻臚寺丞
李可灼自言欲進紅丸諸臣遲疑間可灼袖出萬病
回春書一卷載有此方旋召入診脉即和藥以進帝
舉玉杯飲之曰似已小安次蚤即聞上昇矣

下錫 陸深金臺紀聞金華名醫戴元禮被召至京見
一醫家迎求溢戶其按方發劑皆無他異偶一人求
藥者既去追而告曰臨煎時下錫一塊元禮始大異

之叩之曰是古方耳元禮求得其書乃是錫字

下蝗 震澤紀聞太宗得痼疾諸藥不效召戴元禮至
問上所嗜曰生芹曰吾得之矣乃處劑以進是夜暴
下視之皆細蝗也蓋食生芹所致耳

砭犬 異林葛可久遇異人授以醫術道有狂犬可久
曰是可療惡少環執之砭其腎犬臥良久差

授針術 明史稿歸安凌漢章雲遊泰山古廟有病人
垂死雲嗟嘆久之一道人曰汝欲生之乎為針其左

股立蘇曰此人毒氣內侵非死也毒散自生耳因授以針術雲拜受之為人治疾無不效

禮藥王 王世貞贈盛國醫詩任是醫和通國脉可煩

臣意對師方生平怪殺兒曹嬾擁篲爭先禮藥王

診腸斷 徐禎卿集葛可久醫術神異羣少戲里中望

見可久一少年從牖躍入室曰召可久診視不驗則羣噪之可久診之曰腸已斷矣當立死耳有頃少年死

證治準繩 明史稿金壇王肯堂官檢討貶福建參政

博極羣書兼通醫學所著證治準繩為醫家所宗

本草綱目 明史稿蘄州李時珍字東璧病本草之雜

乃窮搜博採芟煩補闕歷時三十年閱書八百餘家

稿三易而成本草綱目一書書成將上之朝而遽卒

後其子來獻神宗命刊行之

艾師 楊維禎詩艾師艾師古中黃肘有補注明堂方

籠有岐伯神鍼之海草篋有軒轅洪爐之燧光

杏村清杵 沈周分得藥臼謝醫詩抱疾人來識清杵
數聲遙在杏花村

藥市春 楊慎藥市賦蓬邱仙伯七刀圭而通神奈園
老宿品千二而稱珍何如蓉城之日重開藥市之春

卜筮

羊胛卜 元史睿宗燒羊胛骨卜得吉兆果大勝

銀河棹 楊慎集元至正間瑞州曾義山賣卜有瞽而
丐者曰明有三人共一目者來宜叩之已果然遂以

其書相授且畫沙指訣其書名銀河棹山後占卜如神臨終謂其子曰某月日劉姓過吾家取書畀之後劉伯溫官高安果經山家其子如言授焉

白馬將軍 元史張廷瑞攻羗其酋長羅拜曰我近生裂羊脾卜之視肉之分拆分吉凶其兆曰有白馬將軍來可不勞兵而罷今公馬果白敢不從命

教學奇中 元通鑑阿榮長文翰尤深於數學言多奇中天歷三年春策士于庭阿榮與虞集會于直廬語

集曰更一科後科舉當輟輟兩科而復復則人材彬彬矣後竟如其言

金姬卜 湧幢小品李金兒章邱人從父得卜藝言皆響應被俘入張士誠宮高郵被圍策其必勝及士誠據姑蘇則以為不可居且有患士誠不聽且將冊為妃姬知不免遂閉目而逝後屢見夢于士誠妻亂後為默保其二子

三殿當燬 卓異記永樂時三殿工畢上召刻漏博士

胡崙卜之曰明年某月某日午時當燬上怒囚之至
期獄卒報午過無火胡服毒死則午正三刻也殿果
焚

筮復辟 明紀事本末上皇北狩陰遣使諭鎮守太監
裴富富私問卜者全寅筮得乾之初九附奏曰大吉
可以賀矣龍君象也四初之應也龍潛躍必以秋應
以壬午浹歲而更龍變化之物也庚者更也庚午中
秋車駕其還乎還則必幽勿用故也或躍應焉或之

者疑之也計七八年當必復辟故曰大吉

狸七斤 異林胡宏善卜易有一人家暴富心疑宏為
設卦曰家有狸奴走入室是其祥也曰然曰狸形必
大稱之得幾斤曰七斤曰富及七載狸奴當去後果
然

占勝兆 稗史彙編華亭沈昭陽善卜太宗時驛取至
京命於午門上布卦問英國公征南事昭陽占曰此
大勝之兆時正午當得捷音至其時果有飛檄至報

安南平上大悅賜鈔幣

籌易知赦 嘉靖注畧楊爵復繫又三年冬日爵籌易
與同繫者飲曰須盡此杯明日出矣是日大高元殿
火火中恍呼爵名者遂併釋為民

十八孩兒 明紀事本末李自成有卜者善河洛數名
宋獻策長不滿三尺獻圖識云十八孩兒當主神器
自成大喜拜軍師

賜筮錢 程敏政集全寅字景明英廟北狩占復辟日

月皆符將官之固辭乃命工鑄陰陽神靈四字為筮
錢十八文製牙盒貯之并金杯彩幣以賜

九宮數 楊維禎集洪州矮張如矮瓠大帛深衣更雙
屨自言矮瓠不食酒惟貯先天九宮數

瞽師 高啟贈談鬼谷數瞽師詩瞽師得異傳相去逾
千春不為縱橫說談數妙入神

異術

識鷄卵 元史田忠良好學通儒雜家言世祖召至俄

指西序第二人謂忠良曰彼手中握何物對曰鷄卵也果然又帝出獵駐輦召忠良曰朕有所遺汝知何物還可復得否對曰其數珠乎明日二十里外當有得而來獻者已而果然

通鳥語 元史補遺瑪爾藏能通禽鳥語道其呼鳴之故試之輒驗互見幼慧

定相日 談薈元相哥元名桑哥拜相後延日者書桑字令拆曰欲知相位久近曰木字十八也上有三個